

巢氏諸病源候總論

七

中國醫學大成第五集

通治類

巢氏諸病源候總論

七

上海大東書局印行

巢氏諸病源候總論

隋 太醫博士巢元方撰

鄞縣曹赤電炳章圈點

卷三十七

婦人雜病諸候 一 凡三十二論

風虛勞冷候

風虛勞冷者。是人體虛勞而受於冷也。夫人將攝順理。則血氣調和。風寒暑濕不能爲害。若勞傷血氣。便致虛損。則風冷乘虛而千之。或客於經絡。或入於腹內。其經絡得風冷。則氣血冷澀。不能自溫於肌膚也。腹內得風冷。則脾胃弱。不消飲食也。隨其所傷而變成病。若大腸虛者。則變下利。若風冷入於子臟。則令臟冷。致使無兒。若搏於血。則血澀壅。亦令經水不利。斷絕不通。

風邪驚悸候

風邪驚悸者。是爲風邪乘于心故也。心藏神。爲諸藏之主。若血氣調和。則心神安定。若虛損。則心神虛弱。致風邪乘虛干之。故驚而悸動不定也。其驚悸不止。則變恍惚而憂懼。

虛汗候

人以水穀之精。化爲血氣津液。津液行于腠理。若勞傷損動。陽氣外虛。腠理開。血氣衰弱。故津液洩越。令多汗也。其虛汗不止。則變短氣柴瘦而羸瘠也。亦令血脈減損。經水否澀。甚者閉斷不通也。

中風候

中風者。虛風中於人也。風是四時八方之氣。常以冬至之日。候其八方之風。從其鄉來者。生長養萬物。若不從其鄉來。名爲虛風。則害萬物。人體虛者。則中之。當時

雖不即發。停在肌膚。後或重傷於風。前後重沓。因體虛則發。人腑臟俞皆在背。中風多從俞入。隨所中之俞而發病。若心中風。但得偃臥。不得傾側。汗出若唇赤。汗流者可治。急灸心俞百壯。若唇或青或白或黃或黑。此是心壞爲水。面目亭亭。時悚動。皆不可復治。五六日而死。若肝中風。踞坐不得低頭。若邊兩目連額。上色微有青者。唇青而面黃可治。急灸肝俞百壯。若大青黑面一黃一白者。是肝已傷。不可復治。數日而死。若脾中風。踞而腹滿。身通黃。吐鹹水。汗出者可治。急灸脾俞百壯。若手足青者。不可復治。腎中風。踞而腰痛。視脇左右。未有黃色。如餅糶。大者可治。急灸腎俞百壯。若齒黃赤。鬢髮直。面土色。不可復治。肺中風。側臥而胸滿。短氣。冒悶。汗出。視目下鼻上下兩邊。下行至口。色白可治。急灸肺俞百壯。若色黃爲肺已傷。化爲血。而不可復治。其人當妄掇空。自拈衣。此亦數日而死。

中風口噤候

中風口噤。是體虛受風。風入頷頰夾口之筋也。手三陽之筋。結入於頷頰。足陽明之筋。上夾於口。而風挾冷乘虛而入其筋。則筋攣。故引牙關急而口噤。

角弓反張候

角弓反張。是體虛受風。風入諸陽之經也。人陰陽經絡周環於身。風邪乘虛入諸陽之經。則腰背反折。攣急如角弓之狀。

偏風口喎候

偏風口喎。是體虛受風。風入於夾口之筋也。足陽明之筋上夾於口。其筋偏虛而風因乘之。使其經筋偏急不調。故令口喎僻也。

賊風偏枯候

賊風偏枯。是體偏受風。風客於半身也。人有勞傷血氣。半身偏虛者。風乘虛入客爲偏風也。其風邪入深。真氣去。邪氣生。則爲偏枯。此由血氣衰損爲風所客。令血氣不相周榮於肌肉。故令偏枯也。

風眩候

風眩是體虛受風。風入於腦也。諸腑臟之精皆上注於目。其血氣與脈并上屬於腦。循脈引於目。系目系急。故令眩也。其眩不止。風邪甚者。變顛倒爲癩疾。

癩狂候

癩者卒發仆地。吐涎沫。口喎目急。手足繚戾。無所覺知。良久乃甦。狂者或言語倒錯。或自高賢。或罵詈不避親疎。亦有自定之時。皆由血氣虛受風邪所爲。人稟陰陽之氣而生。風邪入并於陰。則爲癩。入并於陽。則爲狂。陰之與陽。更有虛有實。隨其虛時爲邪所并。則發。故發癩又發狂。又在胎之時。其母卒大驚動精氣。并居亦令子發癩。此則小兒而發癩者是。非關長因血氣虛損受風邪所爲。又有五癩。一曰陽癩。二曰陰癩。三曰風癩。四曰濕癩。五曰勞癩。此蓋隨其感處之由立名。又有牛馬猪雞狗之癩。皆死。其癩發之時。聲形狀似於牛馬等。故以爲名也。俗云病癩人忌食六畜之肉食者。癩發之狀。皆悉象之。

風瘙痒候

風癢痒者。是體虛受風。風入腠理與血氣相搏。而俱往來在於皮膚之間。邪氣微。不能衝擊爲痛。故但癢痒也。

風蠱候

風蠱者。由體虛受風。風在皮膚之間。其狀淫淫躍躍。若蠱物刺。一身盡痛。侵傷血氣。動作如蠱毒之狀。謂之風蠱。

癩候

癩病是賊風入百脈傷五臟。連注骨髓。俱傷而發於外。使眉睫墮落。皮肉生瘡。筋爛節斷。語聲嘶破。而毒風之變。冷熱不同。故腠理發癩。形狀亦異。

氣候

氣病是肺虛所爲。肺主氣。五臟六腑皆稟氣於肺。憂思恐怒。居處飲食不節。傷動肺氣者。並成病。其氣之病有虛有實。其肺氣實。謂之有餘。則喘逆上氣。其肺氣虛。

謂之不足。則短乏少氣。而有冷有熱。熱則四肢煩熱也。冷則手足逆冷也。

心痛候

心痛是臟虛受風。風冷邪氣乘於心也。其痛發有死者。有不死成疹者。心爲諸臟主而藏神。其正經不可傷。傷之而痛者。名爲真心痛。朝發夕死。心之支別絡爲風冷所乘而痛者。故痛發乍間乍甚而成疹也。

心腹痛候

心腹痛者。腑臟虛弱。風邪客於其間。與真氣相擊故痛。其痛隨氣下上。或上衝於心。或下攻於腹。故心腹痛。

腹中痛候

腹痛者。由臟腑虛弱。風冷邪氣乘之。邪氣與正氣相擊。則腹痛也。

小腹痛候

小腹痛者。此由胞絡之間。宿有風冷。搏於血氣。停結小腹。因風虛發動。與血相擊。故痛。

月水不調候

婦人月水不調。由勞傷氣血。致體虛受風冷。風冷之氣客於胞內。傷衝脈任脈。損手太陽少陰之經也。衝任之脈皆起於胞內。爲經絡之海。手太陽小腸之經。手少陰心之經。此二經爲表裏。主上爲乳汁。下爲月水。然則月水是經絡之餘。若冷熱調和。則衝脈任脈氣盛。太陽少陰所主之血宣流。以時而下。若寒溫乖適。經脈則虛。有風冷乘之。邪搏於血。或寒或溫。寒則血結。溫則血消。故月水乍多乍少。爲不調也。診其脾脈沈之而喘。浮之而虛。若腹脹煩滿。胃中有熱。不嗜食。食不化。大便難。四肢苦痺。時不仁。得之房內。月事不來。而併。又少陰脈澀。則血不來。此爲居經。三月一來。又脈微血氣俱虛。年少者亡血之脈也。乳子下利爲可。不爾者。此爲居經。亦三月一來。又經水一月再來者。經來時其脈欲自如常。而反微者。不利。不汗出者。其經二月必來。

養生方云。病憂恚泣哭。以令陰陽結氣不和。故令月水時少時多。內熱苦渴。色惡。體肌枯身重。

月水不利候

婦人月水不利者。由勞傷血氣。致令體虛而受風冷。風冷客於胞內。損傷衝任之脈。手太陽少陰之經故也。衝脈任脈之海。皆起於胞內。手太陽小腸之經也。手少陰心之經也。此二經爲表裏。主下爲月水。風冷客於經絡。搏於血氣。血得冷則壅滯。故令月水來不宣利也。診其脈從寸口邪入上者。名曰解脈。來至狀如琴絃。苦小腹痛。經月不利。孔竅生瘡。又左手關上脈足厥陰經也。沈爲陰。陰虛者。主月經不利。腰腹痛。尺脈滑。血氣實。經絕不利。又脈左手尺來而斷絕者。月水不利也。又脈寸關調如故。而尺脈絕而不至者。月經不利。當患小腹引腰絞痛。氣積聚上。又胸脅。

月水來腹痛候

婦人月水來腹痛者。由勞傷血氣。以致體虛。受風冷之氣。客於胞絡。損衝任之脈。手太陽少陰之經。衝脈任脈皆起於胞內。爲經脈之海也。手太陽小腸之經。手少陰心之經也。此二經共爲表裏。主下爲月水。其經血虛受風冷。故月水將下之際。血氣動於風冷。風冷與血氣相擊。故令痛也。

月水不斷候

婦人月水不斷者。由損傷經血。衝脈任脈虛損故也。衝任之脈。爲經脈之海。手太陽小腸之經也。手少陰心之經也。此二經爲表裏。主下爲月水。勞傷經脈。衝任之氣虛損。故不能制其經血。故令月水不斷也。凡月水不止而合陰陽冷氣上入藏。令人身體面目痿黃。亦令絕子不產也。

月水不通候

婦人月水不通者。由勞損血氣。致令體虛。受風冷。風冷邪氣客於胞內。傷損衝任之脈。并手太陽少陰之經。致胞絡內絕。血氣不通故也。衝任之脈起於胞內。爲經

脈之海。手太陽小腸之經也。手少陰心之經也。此二經爲表裏。主下爲月水。風冷傷其經血。血性得溫則宣流。得寒則澀閉。旣爲冷所結搏。血結在內。故令月水不通。

又云。腸中鳴則月事不來。病本於胃。所以然者。風冷干於胃氣。胃氣虛不能分別水穀。使津液不生。血氣不成。故也。又云。醉以入房。則內氣竭絕傷肝。使月事衰少不來也。所以爾者。肝藏於血。勞傷過度。血氣枯竭於內也。又先經唾血及吐血。下血。謂之脫血。使血枯亦月事不來也。又利血經水亦斷。所以爾者。津液減耗。故也。須利止津液生。其經自下。診其腎脈微澀。不利者。是月水不來也。又左手關後尺內浮爲陽。陽絕者無膀胱脈也。月事則閉。又肝脈沉之而急。浮之亦然。時小便難。苦頭眩痛。腰痛。足爲寒。時疼。月事不來。時恐得之少。時有所墮墜也。月水不通。久則血結於內。生塊。變爲血瘕。亦作血癥。血水相併。壅澀不宣通。脾胃虛弱。變爲水腫也。所以然者。脾候身之肌肉。象于土。土主能尅消于水。水血旣并。脾氣衰弱。不能尅消。故水氣流溢。浸漬肌肉。故腫滿也。

帶下候

帶下者由勞傷過度。損動經血。致令體虛受風冷。風冷入于胞絡。搏其血之所成也。衝脈任脈爲經絡之海。任之爲病。女子則帶下。而手太陽爲小腸之經也。手少陰心之經也。心爲藏主於裏。小腸爲府主於表。此二經之血在於婦人。上爲乳汁。下爲月水。衝任之所統也。衝任之脈既起於胞內。陰陽過度。則傷胞絡。故風邪乘虛而入於胞。損衝任之經。傷太陽少陰之血。致令胞絡之間。穢液與血相兼。連帶而下。冷則多白。熱則多赤。故名帶下。又帶有三門。一曰胞門。二曰龍門。三曰玉門。已產屬胞門。未產屬龍門。未嫁屬玉門。又未嫁女亦有三病。一者經水初下。陰內熱。或當風。或因扇得冷。二者或因以寒水洗之得病。三者或見月水初下。驚恐得病。皆屬帶下也。又婦人年五十。所病下利數十日不止。暮發熱。小腹裏急痛。腹滿。手掌熱煩。唇口乾燥。此因曾經半產。瘀血在小腹不去。此疾必帶下。所以知瘀血者。唇口燥卽是其證。又婦人年五十。所病但苦背痛。時時腹中痛。少食多厭。診其脈陽微關尺小緊。形脈不相應病。如此在下焦。此必帶下。又婦人帶下六極之病。脈浮卽腸鳴腹滿。脈緊卽腸中痛。脈數則陰中痒痛生瘡。脈弦卽陰疼掣痛。

帶五色俱下候

帶下病者。由勞傷血氣。損動衝脈任脈。致令其血與穢液兼帶而下也。衝任之脈。爲經脈之海。經血之行。內榮五臟。五臟之色。隨藏不同。傷損經血。或冷或熱。而五臟俱虛損者。故其色隨穢液而下爲帶。五色俱下。

帶下青候

此由勞傷血氣。損動衝脈任脈。衝任之脈。皆起於胞內。爲經脈之海。手太陽小腸之經也。手少陰之經也。此二經主下爲月水。若經脈傷損。衝任氣虛。不能約制經血。則與穢液相兼而成帶下。然五臟皆稟血氣。其色則隨藏而不同。肝藏之色青。帶下青者。是肝臟虛損。故帶下而挾青色。

帶下黃候

勞傷血氣。損動衝脈任脈。衝任之脈。皆起於胞內。爲經脈之海。手太陽小腸之經也。手少陰心之經也。此二經主下爲月水。若經脈傷損。衝任氣虛。不能約制經血。則血與穢液相兼而成帶下。然五臟皆稟血氣。其色則隨藏不同。脾藏之色黃。帶

下黃者。是脾藏虛損。故帶下而挾黃色。

帶下赤候

勞傷血氣。損動衝脈任脈。衝任之脈皆起於胞內。爲經脈之海。手太陽小腸之經也。手少陰心之經也。此二經主下爲月水。若經脈傷損。衝任氣虛。不能約制經血。則與穢液相兼而成帶下。然五臟皆稟血氣。其色則隨臟不同。心臟之色赤。帶下赤者。是心臟虛損。故帶下而挾赤色。

帶下白候

勞傷血氣。損動衝脈任脈。衝任之脈皆起於胞內。爲經脈之海。手太陽小腸之經也。手少陰心之經也。此二經主下爲月水。若經脈傷損。衝任氣虛。不能約制經血。則血與穢液相兼而成帶下。然五臟皆稟血氣。其色則隨臟不同。肺臟之色白。帶下白者。肺臟虛損。故帶下而挾白色。

帶下黑候

勞傷血氣。損動衝脈任脈。衝任之脈皆起於胞內。爲經脈之海。手太陽小腸之經也。手少陰心之經也。此二經主下爲月水。若經脈傷損。衝任氣虛不能約制經血。則血與穢液相兼而成帶下。然五臟皆稟血氣。其色則隨臟不同。腎臟之色黑。帶下黑者。是腎臟虛損。故帶下而挾黑色也。

帶下月水不利候

帶下之病。由勞傷血氣。損動衝脈任脈。衝任之脈起於胞內。爲經脈之海。經血傷損。故血與穢液相兼而成帶下。帶下輸瀉則臟虛。而重被風冷乘之。入傷手太陽少陰之經。則使月水不利。所以爾者。手太陽小腸之經也。爲腑主表。手少陰心之經也。爲臟主裏。此二經共合其經血。上爲乳汁。下爲月水。血性得寒則澀。既爲風冷所乘。故帶下而血澀。所以月水不利也。

帶下月水不通候

帶下之病。由勞傷血氣。損動衝脈任脈。衝脈任脈起於胞內。爲經脈之海。經血傷

損。故血與穢液相兼而成帶下。帶下輸瀉則臟虛。而重被風冷乘之。入傷手太陽少陰之經。則使月水不通。所以爾者。手太陽小腸之經也。爲腑主表。手少陰心之經也。爲臟主裏。此二經共合其經血。上爲乳汁。下爲月水。血性得寒則澀。旣爲風冷所乘。冷氣沈積。故血結壅。所以帶下月水不通。凡月水不通。血結積聚。變成血瘕。亦變面目浮腫也。

巢氏諸病源候總論

隋 太醫博士巢元方撰

鄞縣曹赤電炳章圈點

卷三十八

婦人雜病諸候一一凡十九論

漏下候

漏下者。由勞傷血氣。衝任之脈虛損故也。衝脈任脈爲十二經脈之海。皆起於胞內。而手太陽小腸之經也。手少陰心之經也。此二經主上爲乳汁。下爲月水。婦人經脈調適。則月下以時。若勞傷者。以衝任之氣虛損。不能制其脈經。故血非時而下。淋瀝不斷。謂之漏下也。診其寸口脈弦而大。弦則爲減。大則爲芤。減卽爲寒。芤卽爲虛。寒芤相搏。其脈爲革。婦人卽半產漏下。又尺寸脈虛者漏血。漏血脈浮。不

可治也。

養生方云。懷娠未煩三月。服藥自傷下血。下血未止而合陰陽。邪氣結因漏治不止。狀如腐肉。在於子臟。令內虛。

漏五色俱下候

漏下之病。由勞傷血氣。衝任之脈虛損故也。衝脈任脈爲經脈之海。起於胞內。手太陽小腸之經也。手少陰心之經也。此二經之血。主上爲乳汁。下爲月水。衝任之脈虛損。不能約制其經血。故血非時而下。淋瀝成漏也。五臟皆稟血氣。虛則淋瀝成漏。五臟傷損。五臟之色隨臟不同。若五臟皆虛損者。則漏五色隨血而下。診其尺脈急而弦大者。風邪入少陰。女子漏下赤白。又漏下赤白不止。脈小虛滑者生。脈大緊實數者死也。又漏血下赤白。日下血數斗。脈急疾者死。遲者生。養生方云。夫婦自共諍訟。訟意未和平。強從子臟閉塞。留結爲病。遂成漏下。黃白如膏。

漏下青候

勞傷血氣。衝脈任脈虛損。衝任之脈。皆起於胞內。爲經脈之海。手太陽小腸之經也。手少陰心之經也。此二經主下爲月水。傷損經血。衝任之氣虛。故血非時而下。淋瀝不斷。而成漏下。五臟皆稟血氣。肝臟之色青。漏下青者。是肝臟之虛損。故漏下而挾青色也。

漏下黃候

勞傷血氣。衝任之脈。皆起於胞內。爲經脈之海。手太陽小腸之經也。手少陰心之經也。此二經主下爲月水。傷損經血。衝任之氣虛。故血非時而下。淋瀝不斷。而成漏下。五臟皆稟血氣。脾臟之色黃。漏下黃者。是脾臟之虛損。故漏下而挾黃色也。

漏下赤候

勞傷血氣。衝脈任脈。皆起於胞內。爲經脈之海。手太陽小腸之經也。手少陰心之經也。此二經主下爲月水。傷損經血。衝任之氣虛。故血非時而下。淋瀝不止。而成漏下。五臟皆稟血氣。心臟之色赤。漏下赤者。是心臟之虛損。故漏下而挾赤色。

漏下白候

勞傷血氣。衝任之脈皆起於胞內。爲經脈之海。手太陽少陰二經。主下爲月水。傷損經血。衝任之氣虛。故血非時而下。淋瀝不斷而成漏下。五臟皆稟血氣。肺臟之色白。漏下白者。是肺臟之虛損。故漏下而挾白色也。

漏下黑候

勞傷血氣。衝任之脈皆起於胞內。爲經脈之海。手太陽小腸之經也。手少陰心之經也。此二經主下爲月水。傷損經血。衝任之氣虛。故血非時而下。淋瀝不斷而成漏下。五臟皆稟血氣。腎臟之色黑。漏下黑者。是腎臟之虛損。故漏下而挾黑色也。

崩中候

崩中者。腑臟傷損。衝脈任脈血氣俱虛故也。衝任之脈爲經脈之海。血氣之行。外

循經絡。內榮腑臟。若無傷則腑臟平和。而氣調適。經下以時。若勞動過度。致腑臟俱傷。而衝任之氣虛。不能約制其經血。故忽然暴下。謂之崩中。診其寸口脈微遲。尺脈微於寸。寸遲爲寒在上焦。但吐耳。今尺脈遲而弦如此。小腸痛腰脊痛者。必下血也。

白崩候

白崩者。是勞傷胞絡。而氣極所爲。肺主氣。氣極則肺虛冷也。肺臟之色白。虛冷勞極。其色與胞絡之間。穢液相挾崩傷而下。爲白崩也。

崩中五色俱下候

崩中之病。是傷損衝任之脈。衝任之脈皆起於胞內。爲經脈之海。勞傷過度。衝任氣虛。不能統制經血。故忽然崩下。謂之崩中。五臟皆稟血氣。五臟之色隨臟不同。傷損之人。五臟皆虛者。故五色隨崩俱下。其狀白崩形如涕。赤崩形如紅汁。黃崩形如爛瓜汁。青崩形如藍色。黑崩形如乾血色。

崩中漏下候

崩中之狀。是傷損衝任之脈。衝任之脈皆起於胞內。爲經脈之海。勞傷過度。衝任氣虛不能約制經血。故忽然崩下。謂之崩中。崩而內有瘀血。故時崩時止。淋瀝不斷。名曰崩中漏下。

崩中漏下五色候

崩中之病。是勞傷衝任之脈。衝任之脈起於胞內。爲經脈之海。勞傷過度。衝任氣虛不能統制經血。故忽然崩下。謂之崩中。而有瘀血在內。遂淋瀝不斷。謂之漏下。漏下不止。致損於五臟。五臟之色隨臟不同。因虛而五色與血俱下。其狀白者如涕。赤者如紅汁。黃者如爛瓜汁。青者如藍色。黑者如乾血色。相雜而下也。

積聚候

積者五臟所生。聚者六腑所成。五臟之氣積名曰積。六腑之氣聚名曰聚也。積痛

不離其部。聚者其痛無有常處。皆由陰陽不和。風冷搏於臟腑而生積聚也。婦人病積經久則令無子。亦令月水不通。所以然者。積聚起於冷。結入子臟。故令無子。若冷氣入於胞絡。冷搏於血。血冷則凝結。故令月水不通。

癖病候

癖病者。由冷氣結聚。飲食不消。停積於脅下。則成癖病。其狀弦急刺痛。得冷則發作也。

疝瘕候

疝瘕之病。由飲食不節。寒溫不調。氣血勞傷。臟腑虛弱。受於風冷。令人腹內與血氣相結所生。疝者痛也。瘕者假也。其結聚浮假而痛。推移而動。婦人病之。有異於丈夫者。或因產後臟虛受寒。或因經水往來取冷過度。非獨關飲食失節。多挾有血氣所成也。診婦人疝瘕。其脈弦急者生。虛弱小者死。又尺脈濇而浮牢。爲血實氣虛也。其發腹痛逆滿。氣上行。此爲婦人胞中絕傷。有惡血久成結瘕。得病以冬。

時來。其真則赤。

癥痞候

癥痞者。由冷熱不調。飲食不節。積在腹內。或腸胃之間與臟相結搏。其牢強推之不移。名曰癥。言其病形徵可驗也。氣壅塞爲痞。言其氣痞澁不宣暢也。皆得冷則發動刺痛。癥痞之病。其形冷結。若冷氣入於子臟。則使無子。若冷氣入於胞絡。搏於血氣。血得冷則澁。令月水不通也。

入瘕候

入瘕者。皆胞胎生產。月水往來。血脈精氣不調之所生也。腎爲陰主開閉。左爲胞門。右爲子戶。主定月水生子之道。胞門子戶主子精神氣所出入。合於中黃門。玉門四邊。主持關元。禁閉子精。臍下三寸。名曰關元。主藏魂魄。婦人之胞。三焦之府。常所從止。然婦人經脈愈絡合調。則月水以時來至。故能生子而無病。婦人榮衛經絡斷絕不通。邪氣便得往入合於臟。若經血未盡而合陰陽。卽令婦人血脈攣

急。小腹重急支滿。胸脅腰背相引。四支酸痛。飲食不調。結牢惡血不除。月水不時。或月前月後。因生積聚。如懷胎狀。邪氣甚盛者。令人恍惚多夢。寒熱四肢不欲動。陰中生氣腫。內生風甚者。害小便瀉瀉而痛淋瀝。面黃黑成病。則不復生子。其八瘕者。黃瘕、青瘕、燥瘕、血瘕、脂瘕、狐瘕、蛇瘕、鼈瘕也。黃瘕者。婦人月水始下。若新傷墮。血氣未止。臥寤未定。五臟六腑虛羸。精神不治。因以當向大風。便利陰陽開闔。關節四邊中於濕。風氣從下上入陰裏。稽留不去。名爲陰陽虛。則生黃瘕。瘕之聚令人苦四肢寒熱。身重淋露。不欲食。左脅下有血氣結牢。不可得而抑。苦腰背相引痛。月水不利。令人不產。小腹下陰中如刀刺。不得小便。時苦寒熱。下赤黃病。令人無子。青瘕者。婦人新產未滿十日。起行以浣洗太早。陰陽虛。玉門四邊皆解散。子戶未安。骨肉皆痛。手臂不舉。飲食未復。內藏吸吸。又當風臥。不自隱蔽。若居濕席。令人苦寒洒洒。入腹煩悶。沈淖惡血不除。結熱不得前後便。化生青瘕。瘕聚在右脅。藏於背膂。上與臍脾腰下攣。兩足腫。面目黃。大小便難。其後月水爲之不通利。或不復禁狀。如崩中。此自其過所致。令人少子。燥瘕者。婦人月水下惡血未盡。其人虛憊。而以夏月熱行疾走。若舉重移輕。汗出交流。氣力未平。而率以

急怒甚喜。致猥咽不洩。經脈攣急。內結不舒。煩滿少氣。上達胸膈。背脊小腹爲急。月水與氣俱不通。而反以飲清水快心。月水橫流。衍入他臟。不去。有熱因生。燥瘵之聚。大如半杯。上下腹中苦痛。還兩脅下。上引心而煩。害飲食欲吐。胸及腹中不得太息。腰背重。喜臥盜汗。足酸疼痛。久立而痛。小便失時。居然自出。若失精。月水閉塞。大便難。病如此者。其人少子。血瘵病。婦人月水新下。未滿日數而中止。飲食過度。五穀氣盛。溢入他臟。若大飢寒。汲汲不足。呼吸未調。而自勞。血下未定。左右走腸胃之間。留結不去。內有寒熱。與月水合會。爲血瘵之聚。令人腰痛。不可以俛仰。橫骨下有積氣。牢如石。小腹裏急。苦痛背脊疼。深達腰腹下。攣陰裏。若生風冷。子門擗。月水不時。乍來乍不來。此病令人無子。脂瘵者。婦人月水新來。若生未滿三十日。以合陰陽。絡脈分胞門傷。子戶失禁。關節散。五臟六腑津液流行。陰道。關動百脈。關樞四解。外不見其形。子精與血氣相遇。犯禁。子精化不足。成子。則爲脂瘵之聚。令人支滿裏急。痛疾痺引。小腹重。腰背如刺狀。四肢不舉。飲食不甘。臥不安席。左右走腹中切痛。時瘡時甚。作者少氣頭眩。身體解墮。苦寒惡風。膀胱脹。月水乍來乍去。不如常。大小便血不止。如此者。令人無子。狐瘵者。婦人月水

當日數來而反悲哀憂恐。或遠行逢暴風疾。雷雨電驚恐。衣被沈濕。疲倦少氣。心中怳怳未定。四肢懈惰。振寒。脈氣絕。精神遊亡。胞氣入於陰裏不去。生狐瘕之聚。食人臟。令人月水閉不通。小便瘀。與胸脅腰背痛。陰中腫。小便難。胞門子戶不受男精。五臟氣盛。令嗜食欲嘔。若睡多所思。如有娠狀。四肢不舉。有此病者。終身無子。其瘕有手足成形者。殺人也。未成者可治。蛇瘕者。婦人月水已下。新止適閉未復。胞門子戶勞傷。陰陽未平復。榮衛分行。若其中風暴病羸劣。飲食未調。若已起當風行。厥度泥塗。用清寒太早。若坐濕地。名陰陽亂。腹中虛。且未飲食。若遠道之餘。污井之水。不潔之食。吞蛇鼠之精。留結不去。因生蛇瘕之聚。上食心肝。長大其形。若漆在臍上下。還疔左右脅。不得氣。兩股脛間若漆疾。小腹急。小便赤黃。膀胱引陰中攣。腰背痛。難以動作。苦寒熱。月水或多或少。有此病者。不復生子。其手足成形者。殺人。未成者可治。

鼈瘕者。婦人月水新至。其人劇吐疲勞。衣服沈濕。不以時去。若當風睡。兩足踐濕地。恍惚覺悟。蹠立未安。顏色未平復。見所好心爲開。魂魄感動。五內脫消。若以入水浣洗沐浴。不以時出。神不守。水精與邪氣俱入。至上三焦之中募。玉門先閉。津

液妄行。留結不去。因生鼈瘕之聚。大如小盤。令人小腹切痛。惡氣走上下。腹中苦痛。若存若亡。持之躍手。不利陰裏。腰背亦痛。不可以息。月水喜敗不通。面目黃黑。脫聲少氣。有此病者。令人絕子。其瘕有手足成形者。殺人。未成者可治。

帶下二十六疾候

諸方說三十六疾者是十二癥九痛七害五傷三固。謂之三十六疾也。十二癥者。是所下之物。一者如膏。二者如青血。三者如紫汁。四者如赤皮。五者如膿痂。六者如豆汁。七者如葵羹。八者如凝血。九者如清血。血似水。十者如米汁。十一者如月浣。十二者經度不應期也。九痛者。一者陰中痛傷。二者陰中淋痛。三者小便卽痛。四者寒冷痛。五者月水來腹痛。六者氣滿並痛。七者汁出陰中如蟲齧痛。八者脅下皮痛。九者腰痛。七害者。一者害食。二者害氣。三者害冷。四者害勞。五者害房。六者害姪。七者害睡。五傷者。一者窮孔痛。二者中寒熱痛。三者小腹急牢痛。四者藏不仁。五者子門不正引背痛。三固者。一者月水閉塞不通。其餘二固者。文闕不載。而張仲景所說三十六種疾。皆由于臟冷熱勞損而挾帶下。起於陰內。

條目混漫。與諸方不同。但仲景義最玄深。非愚淺能解。恐其文雖異。其義理實同也。

無子候

婦人無子者。其事有三也。一者墳墓不祀。二者夫婦年命相尅。三者夫病婦疹。皆使無子。其若是墳墓不祀。年命相尅。此二者。非藥能益。若夫病婦疹。須將餌故得有效也。然婦人挾疾無子。皆由勞傷血氣。冷熱不調。而受風寒。客於子宮。致使胞內生病。或月經澁閉。或崩血帶下。致陰陽之氣不和。經血之行乖候。故無子也。診其右手關後尺脈浮。則爲陽。陽脈絕。無子也。又脈微澁。中年得此。爲絕產也。少陰脈如浮緊。則絕產惡寒。脈尺寸俱微弱。則絕嗣不產也。其湯熨針石。別有正方。補益吐納。今附於後。

養生方云。月初出時。日入時。向月正立。不息八通。仰頭吸月光精。入咽之。令人陰氣長。婦人吸之。陰氣益盛。子道通。陰氣長。益精髓腦。少小者。婦人至四十九已上。還子斷緒者。卽有子。久行不已。卽成仙矣。

巢氏諸病源候總論 卷三十八 婦人雜病諸候二

巢氏諸病源候總論

隋 太醫博士巢元方撰

鄞縣曹赤電炳章圈點

卷三十九

婦人雜病諸候二凡四十論

月水不利無子候

月水不利而無子者。由風寒邪氣客於經血。則令月水否澀。血結子臟。陰陽之氣不能施化。所以無子也。

月水不通無子候

月水不通而無子者。由風寒邪氣客於經血。夫血得溫則宣流。得寒則凝結。故月

水不通。冷熱血結。搏子臟而成病。致陰陽之氣不調和。月水不通而無子也。月水久不通。非止令無子。血結聚不消。則變爲血瘕。經久盤結成塊。亦作血瘕。血水相并。津液壅澀。脾胃衰弱者。水氣流溢。變爲水腫。如此難可復治。多致斃人。養生方云。少時若新產後急帶舉重。子陰挺出。或傾邪。月水不瀉。陰中激痛。下寒。令人無子。

子臟冷無子候

子臟冷無子者。由將攝失宜。飲食不節。乘風取冷。或勞傷過度。致風冷之氣乘其經血。結於子臟。子臟則冷。故無子。

帶下無子候

帶下無子者。由勞傷於經血。經血受風邪。則成帶下。帶下之病。白沃與血相兼帶而下也。病在子臟。胞內受邪。故令無子也。診其右手關後尺中脈浮爲陽。陽絕者。無子脈也。苦足逆冷。帶下故也。

結積無子候

五臟之氣積名曰積。藏積之生。皆因飲食不節。當風取冷過度。其子臟勞傷者。積氣結搏於子臟。致陰陽血氣不調和。故病結積而無子。養生方云。月水未絕。以合陰陽精氣入內。令月水不節。內生節聚。令絕子不復產乳。

數失子候

婦人數失子者。或由乖陰陽之理。或由觸犯禁忌。既產之後。而數失兒。乃非臟腑生病。故可以方術防斷之也。

腹滿少氣候

腹滿少氣者。由臟虛而觸風冷。風冷搏於血氣。故腹滿。腹滿則氣壅在內。而呼吸不足。常如少氣之狀。故云少氣腹滿也。

胸脅脹滿候

胸脅脹滿者。由勞傷體虛。而風冷之氣乘之。客於臟腑腸胃之間。搏於血氣。血氣壅之。不宣。氣得冷則逆。與血飲相搏。上搶胸脅。所以令胸脅脹滿也。

客熱候

人血氣有陰陽。臟腑有虛實。實則生熱。虛則受寒。互相乘。如此人身內陰陽冷熱。自相乘也。此云客熱者。是體虛而將溫過度。外熱加之。非腑臟自生。故云客熱也。其狀上焦胸膈之間。虛熱口燥。或手足煩熱。腸胃之內無實熱也。

煩滿候

煩滿者。由體虛受邪。使血氣相搏。而氣逆上乘於心胸。氣否不宣。故令煩滿。煩滿者。心煩胸間氣滿急也。

身體卒痛候

身體卒痛者。由勞動血氣。而體虛受於風冷。客其經絡。邪氣與氣交擊於肌肉之間。故身體卒痛也。

左脅痛如刀刺候

左脅偏痛者。由經絡偏虛邪故也。人之經絡。循環於身。左右表裏。皆周偏。若氣血調和。不生虛實。邪不能傷。偏虛者。偏受風邪。今此左脅痛者。左邊偏受病也。但風邪在於經絡。與血氣相乘。交爭衝擊。故痛發如刀刺。

痰候

痰者由水飲停積。在於胸膈所成。人皆有痰。少者不能爲害。多則成患。但胸膈飲瀆於五臟。則變令目眩頭痛也。

嗽候

嗽者肺傷微寒故也。寒之傷人。先傷肺者。肺主氣候皮毛。故寒客皮毛。先傷肺也。

其或寒微者。則欬嗽也。

咽中如炙肉鬱候

咽中如炙肉鬱者。此是胸膈痰結與氣相搏。逆上咽喉之間結聚。狀如炙肉之鬱也。

喉痛候

喉痛者。風熱毒客於其間故也。十二經脈有循頰喉者。五臟在內而經脈循於外。臟氣虛則經絡受邪。邪氣搏於藏氣則生熱。熱乘其脈而搏咽喉。故令喉痛也。

癭候

癭病者。是氣結所成。其狀頸下及皮寬腿腿然。憂恚思慮。動於腎氣。腎氣逆結宕所生。又諸山州縣人飲水多者。沙搏於氣結頸下。亦成癭也。

吐血候

吐血者皆由傷損腑臟所爲。夫血外行經絡。內榮腑臟。若傷損經絡。臟腑則虛。血行失其常理。氣逆者吐血。又怒則氣逆。甚則嘔血。然憂思驚怒。內傷腑臟。氣逆上者。皆吐血也。

口舌出血候

口舌出血者。心脾傷損故也。脾氣通於口。心氣通於舌。而心主血脈。血榮於腑臟。通於經絡。若勞損腑臟。傷動經脈。隨其所傷之經虛者。血則妄行。然口舌出血。心脾二臟之經傷也。

汗血候

汗血者。肝心二臟虛故也。肝藏血。而心主血脈。心之液爲汗。肝是木。心是火。母子也。血之行。內在腑臟。外通經絡。勞傷肝心。其血脈虛者。隨液發爲汗而出也。

金瘡敗壞候

婦人金瘡未瘥而交會。動於血氣。故令瘡敗壞。

耳聾候

耳聾者。風冷傷於腎。腎氣通於耳。勞傷腎氣。風冷客之。邪與正氣相搏。使經氣不通。故耳聾也。

耳聾風腫候

耳聾風腫者。風邪搏於腎氣故也。腎氣通於耳。邪搏其經。血氣壅澀。不得宣發。故結腫也。

眼赤候

眼眇赤者。風冷客於眇間。與血氣相搏。而淚液乘之。挾熱者則令眇赤。

風眩鼻塞候

風眩而鼻塞者。風邪乘腑臟入於腦也。五臟六腑之精氣皆上注於目。血與氣并屬於腦。體虛爲風邪入腦。則引目。目系急故令頭眩。而腑臟皆受氣於肺。肺主氣。外候在鼻。風邪入腦。又搏肺氣。故頭眩而鼻塞。

鼻衄候

鼻衄者。由傷動血氣所爲。五臟皆稟血氣。血氣和調。則循環經絡。不澀不散。若勞傷損動。因而生熱。氣逆流溢入鼻者。則成鼻衄也。

面黑肝候

面黑肝者。或臟腑有痰飲。或皮膚受風邪。皆令血氣不調。致生黑肝。五臟六腑十二經血。皆上於面。夫血之行。俱榮表裏。人或痰飲漬藏。或腠理受風。致血氣不和。或澀或濁。不能榮於皮膚。故變生黑肝。若皮膚受風。外治則瘥。腑臟有飲。內療方愈也。

面黑子候

面黑子者。風邪搏血氣變化所生。夫人血氣充盛。則皮膚潤悅。若虛損疵點變生黑子者。是風邪變其血氣所生。若生而有之者。非藥可治也。

蛇皮候

蛇皮者。由風邪客於腠理也。人腠理受於風。則閉密。使血氣澀濁。不能榮潤皮膚。斑剝其狀如蛇鱗。世呼蛇體也。亦謂之蛇皮也。

手逆臚候

手逆臚者。經脈受風邪。血氣否澀也。十二經筋脈。有起手指者。其經虛風邪客之。使血氣否澀。皮膚臚枯剝逆起。謂之逆臚。

白禿候

頭瘡有蟲。痂白而髮禿落。謂之白禿。云是人腹內九蟲內蟻蟲。值血氣虛發動所作也。

耳後附骨癱候

附骨癱是風寒搏血脈。入深近附於骨也。十二經之筋脈有絡耳後完骨者。虛則風寒客之。寒氣折血。血否澀不通。深附於骨而成癱也。其狀無頭但腫痛。

腫滿水氣候

水病由體虛受風濕入皮膚搏津液。津液否澀。壅滯在內不消。而流溢皮膚。所以然者。腎主水與膀胱合。膀胱爲津液之府。津液不消。則水停蓄。其外候目下如臥蠶。頸邊人迎脈動甚也。脾爲土主剋水。而脾候肌肉。腎水停積。脾土衰微。不能消。令水氣流溢浸漬皮膚而腫滿。

血分候

血分病者。是經血先斷而後成水病。以其月水壅澀。不通經。血分而爲水。故曰血分。婦人月經通流。則水血消化。若風寒搏於經脈。血結不通。則血水蓄積。成水腫。

病也。

卒腫候

夫腫或風冷。或水氣。或熱毒。此卒腫由腠理虛而風冷搏於血氣。壅結不宣。故卒然而腫。其狀但結腫而不熱是也。

赤流腫候

赤流腫者。由體虛腠理開而風熱之氣客之。風熱與血氣相搏。挾熱毒。其狀腫起色赤。隨氣流行移易。故云流腫。

瘀血候

此或月經否澀不通。或產後餘穢未盡。因而乘風取涼。爲風冷所乘。血得冷則結成瘀也。血瘀在內。則時時體熱面黃。瘀久不消。則變成積聚癥瘕也。

傷寒候

此謂人觸冒於寒氣而成病。冬時嚴寒。攝衛周密者。則寒不能傷人。若辛苦勞役。汗出。觸冒寒氣。即發成病。謂之傷寒也。其輕者微欬鼻塞。嗇嗇小寒。噲噲微熱。數日而歇。重者頭痛體疼。惡寒壯熱。而膏腴之人。肌膚胞弱。雖不大觸冒。其居處小有失宜。則易傷於寒也。自有四時節內。忽有暴寒。傷於人成病者。亦名傷寒。謂之時行傷寒。非觸冒所致。言此時通行此氣。故爲時行也。

時氣候

此謂四時之間。忽有非節之氣。傷人而成病也。而春時應暖而寒。夏時應熱而冷。秋時應涼而熱。冬時應寒而溫。言此四時通行此氣。一氣之至。無問少長。病皆相似。故名爲時氣也。但言其病。若風寒所傷則輕。狀猶如傷寒。少頭痛壯熱也。若挾毒厲之氣則重。壯熱煩毒。或心腹脹滿。多死也。

瘧候

夫瘧病者。由夏傷於暑。客在皮膚。至秋因勞動血氣。腠理虛而風邪乘之。動前暑

熱。正邪相擊。陰陽交爭。陽盛則熱。陰盛則寒。陰陽更虛更盛。故發寒熱。陰陽相離。則寒熱俱歇。若邪動氣至。交爭復發。故瘧休作有時。其發時節漸晏者。此由邪客於風府。邪循膂而下。衛氣一日一夜常大會於風府。其明日日下一節。故其作日晏。其發日早者。衛氣之行風府。日下一節。二十一日下至尾骶。二十二日入脊內。上注於伏衝之脈。其行九日。出於缺盆之內。其氣既上。故其病發更早。其間日發者。由邪氣內薄五藏。橫連募原。其道遠。其氣深。其行遲。不能日作。故間日作。蓄積乃發。凡病瘧多渴引飲。飲不消。乃變爲癖。大腸虛引。飲水入腸胃。則變爲利也。

巢氏諸病源候總論

隋 太醫博士巢方元撰

鄞縣曹赤電炳章圈點

卷四十

婦人雜病諸候四 凡五十論

霍亂候

陰陽清濁相干。謂之氣亂。氣亂在腸胃。爲霍亂也。多因飲食過度。冒觸風冷。冷氣入於腹內。脾氣得冷。則不消水穀。胃氣得冷。則吐逆。腸氣得冷。則下利。其心痛者。先吐。腹痛者。先利。心腹俱痛。吐利並發。其有頭痛壯熱而吐利者。由體盛而挾風之氣搏之。外與血氣交爭。故頭痛發熱也。內乘腸胃。故霍亂吐利也。

嘔吐候

胃氣逆則嘔吐。胃爲水穀之海。其氣不調。而有風冷乘之。冷搏於胃氣。胃氣逆則嘔吐也。

嬖子小兒注車船候

無問男子女人。乘車船則心悶亂。頭痛吐逆。謂之注車注船。特由質性自然。非關宿挾病也。

與鬼交通候

人稟五行秀氣而生。承五臟神氣而養。若陰陽調和。則臟腑強盛。風邪鬼魅不能傷之。若攝衛失節。而血氣虛衰。則風邪乘其虛。鬼干其正。然婦人與鬼交通者。臟腑虛。神守弱。故鬼氣得病之也。其狀不欲見人。如有對忤。獨言笑。或時悲泣。是脈來遲伏。或如鳥啄。皆邪物病也。又脈來綿綿。不知度數。而顏色不變。此亦病也。

夢與鬼交通候

也。夫臟虛者。喜夢婦人。夢與鬼交。亦由腑臟氣弱。神守虛衰。故乘虛因夢與鬼交通也。

脚氣痛弱候

脚氣之病。由人體虛溫濕風毒之氣。先客於脚。從下而上。動於氣。故名脚氣也。江東嶺南。土地卑下。風濕之氣傷於人。初得此病。多不即覺。或先無他疾。而忽得之。或因衆病之得之。此病初甚微。飲食嬉戲。氣力如故。當熟察之。其狀從膝至脚。有不仁。或若痺。或淫淫如蟲行。或微腫。或酷冷。或疼痛。或緩縱不隨。或有攣急。或有至困。能飲食。或有不能食者。或有見飲食而嘔吐者。惡聞食臭者。或有物如脂發於踰腸。逆上衝心氣上者。或有舉體轉筋者。或壯熱頭痛者。或心胸衝悸。寢處不欲見明。或腹內苦痛。而兼下者。或言語錯亂。喜忘誤者。或眼濁精神昏憤者。此皆其證候也。治之緩者。便上入腹。腹或腫。胸脅滿。上氣貫便死。急者不全日。緩者二三日也。其病既入臟。證皆相似。但脈有三品。若脈浮大而緩。宜服續命湯兩劑。若風盛者。宜作越婢湯加朮四兩。若脈轉駛而緊。宜服竹瀝湯。若脈微。宜服風引湯。

二三劑。其緊駛之脈。是三品之最惡脈也。脈浮大者病在外。沉細者病在內。皆當急治之。治之緩慢。則上氣便死也。

脚氣腫滿候

溫濕風毒從脚而上。故令四肢懈惰。緩弱疼痺。甚則上攻名脚氣。而津液爲風濕所折。則津液否澀。而蓄積成水。內則浸漬臟腑。外則流溢皮膚。故令腠理脹密。水氣積不散。故腫也。

淋候

淋者腎虛而膀胱熱也。膀胱與腎爲表裏。俱主水行於胞者。爲小便也。臟腑不調。爲邪所乘。腎虛則小便數。膀胱熱則小便澀。其狀小便痛疼澀數。淋瀝不宣。故謂之淋也。

石淋候

淋而出石謂之石淋。腎主水。水結則化爲石。故腎客沙石。腎爲熱所乘。則成淋。腎虛則不能制石。故淋而出石。細者如麻如豆。大者亦有結如皂莢核狀者。發則燥痛悶絕。石出乃歇。

胞轉候

胞轉之病。由胞爲熱所迫。或忍小便。俱令水氣還迫於胞。屈辟不得充張。外水應入不得入。內洩應出不得出。內外壅脹不通。故爲胞轉。其狀小腹急痛。不得小便。甚者至死。張仲景云。婦人本肥盛。頭舉身滿。今羸瘦。頭舉中空。減胞系了戾。亦致胞轉。

小便不利候

腎與膀胱爲表裏。俱主水。水行小腸入胞爲小便。熱搏其藏。熱氣蘊積。水行則澀。故小便不利也。

小便不通候

水行於小腸。入胞爲小便。腎與膀胱俱主水。此二經爲臟腑。若內生大熱。熱氣入小腸及胞。胞內熱。故小便不通。令小腹脹滿。氣喘急也。

大便不通候

三焦五臟不調和。冷熱之邪結於腸胃。津液竭燥。大腸壅澀。故大便不通。張仲景云。婦人經水過多。亡津液者。亦大便難也。

大小便不利候

冷熱不調。大小腸有遊氣壅在大小腸。不得宣散。蓄積結生熱。故大小便澀不流利也。

大小便不通候

腑臟不和。榮衛不調。陰陽不相通。大小腸否結。名曰關格。關格故大小便不通。自有熱結於大腸。則大便不通。熱結於小腸。則小便不通。今大小便不通者。是大小

二腸受客熱結聚。則大小便不通。此止客熱暴結。非陰陽不通流。故不稱關格。而直云大小便不通。

遺尿候

腎與膀胱為表裏而俱主水。腎氣通於陰。而小便水液之下行者也。腎氣冷。冷入胞。胞虛冷。不能制小便。故遺尿。

小便數候

腎與膀胱為表裏。俱主於水。腎氣通於陰。此二經虛而有熱乘之。熱則小便澀。虛則小便數。熱澀數也。

下利候

腸胃虛弱。為風邪冷熱之氣所乘。腸虛則泄。故變為利也。此下利是水穀利也。熱色黃。冷色白。

帶利候

帶利由冷熱不調。大腸虛冷。熱氣客於腸間。熱氣乘之則變赤。冷氣乘之則變白。冷熱相交。則赤白相雜。而連帶不止。名爲帶利也。其狀白濃如涕。而有血雜。亦有少血者。如白濃涕。而有赤脈。如魚腦。又名魚腦利。

血利候

熱乘血入於大腸爲血利也。血之隨氣。外行經絡。內通臟腑。皆無滯積。若冒觸勞動。生於熱。熱乘血散。滲入大腸。腸虛相化。故血利也。

陰痒候

婦人陰痒。是蟲食所爲。三蟲九蟲在腸胃之間。因臟虛蟲動作。食於陰。其蟲作勢。微則痒。重者乃痛。

脫肛候

肛門大腸候也。大腸虛冷。其氣下衝者。肛門反出。亦有因產用力努偃。氣衝其肛。亦令反出也。

陰腫候

陰腫者。是虛損受風邪所爲。胞經虛而有風邪客之。風氣乘於陰。與血氣相搏。令氣血否澀。腠理壅閉。不得泄越。故令陰腫也。

陰痛候

陰痛之病。由胞絡傷損。致臟虛受風邪。而三蟲九蟲因虛動作。食陰則痛者。其狀成瘡。其風邪乘氣衝擊而痛者。無瘡。但疼痛而已。

陰瘡候

陰瘡者。由三蟲九蟲動作。侵食所爲也。諸蟲在人腸胃之間。若腑臟調和。血氣充實。不能爲害。若勞傷經絡。腸胃虛損。則動作侵食於陰。輕者或痒或痛。重者生瘡。

也。診其少陰之脈。滑而數者。陰中生瘡也。

陰挺出下脫候

胞絡傷損。子臟虛。冷氣下衝。則令陰挺出。謂之下脫。亦有因產而用力偃氣。而陰下脫者。診其少陰脈浮動。浮則為虛。動則為悸。故脫也。

陰冷候

胞絡勞傷。子臟虛損。風冷客之。冷乘於陰。故令冷也。

陰中生息肉候

此由胞絡虛損。冷熱不調。風邪客之。邪氣乘於陰。搏於血氣。變而生息肉也。其狀如鼠乳。

瘻候

此或因帶下。或舉重。或因產時用力。損於胞門。損於子臟。腸下乘而成瘻。

痔病候

痔病由勞傷經絡。而血流滲之所成也。而有五種。肛邊生瘡如鼠乳。出在外時出濃血者。牡痔也。肛邊腫生瘡而出血者。牝痔也。肛邊生瘡痒而復痛者。爲血脈痔也。肛邊腫核痛。發寒熱而出血者。腸痔也。因便而清血出者。血痔也。

寸白候

寸白是九蟲內之一蟲也。凡九蟲在人腹內。居腸胃之間。臟腑氣實則蟲不動。不爲人害。虛者蟲便發動滋長。乃至斃人。又云。飲白酒以桑枝貫牛肉。食生粟生魚。仍飲乳酪。能變生寸白者也。

陰臭候

陰臭由于臟有寒。寒搏於津液。蘊積氣衝於陰。故變臭也。

尿血候

血性得寒則凝。得熱則流散。若勞傷經絡。其血虛熱滲入胞。故尿血也。

大便血候

勞傷經脈則生熱。熱乘於血。血得熱則流散。滲入於大腸。故大便血也。

失精候

也。腎與膀胱合。而腎藏精。若勞動膀胱傷損腎氣。則表裏俱虛。不收制於精。故失精也。

乳腫候

足陽明之經。胃之脈也。其直者從缺盆下於乳。因勞動則腠理虛。受風邪入於榮衛。榮衛否澀。血氣不流。熱結於乳。故令乳腫。其結腫不散則成癰。

妬乳候

此由新產後兒未能飲之。及飲不泄。或斷兒乳。捨其乳汁不盡。皆令乳汁蓄積。與血氣相搏。卽壯熱大渴引飲。牢強掣痛。手不得近是也。初覺便以手助捨去其汁。并令傍人助啣引之。不爾成瘡有膿。其熱勢盛則成癰。

乳癰候

腫結皮薄以澤是癰也。足陽明之經脈。有從缺盆下於乳者。勞傷血氣。其脈虛。腠理虛寒。客于經絡。寒搏於血。則血澀不通。其血又歸之。氣積不散。故結聚成癰。癰氣不宣。與血相搏。則生熱。熱盛乘於血。血化成膿。亦有因乳汁蓄結。與血相搏。蘊積生熱。結聚而成乳癰者。年四十已還。治之多愈。年五十已上。慎不當治之。多死不治。自當終年。又懷娠發乳癰腫。及體結癰。此無害也。蓋懷胎之癰。病起陽明。陽明胃之脈也。主肌肉不傷臟。故無害。診其右手關上脈沉。則爲陰虛者。則病乳癰。乳癰久不瘥。因變爲瘥。

養生方云。熱食汗出。露乳傷風。喜發乳腫。名吹乳。因喜作癰。

發乳潰後候

此謂癰疽發於乳。膿潰之後。或虛憒。或疼痛。或渴也。凡發乳潰後出膿血多。則腑臟虛燥。則渴而引飲。飲入腸胃。腸胃虛則變下利也。

乳瘡候

此謂膚腠理虛。有風濕之氣乘虛客之。與血氣相搏。而熱加之。則生瘡也。

疽發乳候

腫而皮強。上如牛領之皮。謂之疽也。足陽明之脈。有從缺盆下於乳者。其脈虛則腠理開。寒氣客之。寒搏于血。則血澀不通。故結腫而氣又歸之。熱氣洪盛。故成疽也。熱久不散。則肉敗爲膿也。

乳結核候

足陽明之經脈。有從缺盆下於乳者。其經虛風冷乘之。冷折於血。則結腫。夫腫熱則變。敗血爲膿。冷則核不消。又重疲勞動氣而生熱。亦焮焮。其湯熨針石。別有正方。補養宣導。今附於後。

養生方導引法云。踞踞以兩手從曲脚內入據地。曲脚加其上舉尻。其可用行氣。愈瘰癧乳痛。交兩脚以兩手從曲脚任挽。舉十二通。愈瘰癧乳痛也。

石癰候

石癰之狀。微強不甚大。不赤微痛熱。熱自歇。是足陽明之脈。有下於乳者。其經虛爲風寒氣客之。則血澀結成癰腫。而寒多熱少者。則無大熱。但結核如石。謂之石癰。

發背候

五臟不調則致疽。疽者腫結皮強如牛領之皮。六腑不和則致癰。癰者腫結薄以澤是也。腑與癰爲表裏。其經脈循行於身。俞皆在背。腑臟不調和而腠理開。受於

風寒折於血。則結聚成腫。深則爲疽。淺乃爲癰。隨寒所客之處。血則否澀不通。熱又加之。故成癰疽發背也。

改訾候

此爲肉癰發於脅。名爲改訾。由邪氣聚在下管。與經絡血氣相搏所生也。至其變敗狀如癰疽。

發乳後渴飲候

此謂發乳膿潰之後。血氣虛竭。腑臟焦燥。故令渴也。渴引飲不止。飲入腸胃。則變爲下利也。

發乳下利候

此謂發乳而腸胃虛受冷。則下利也。大腸爲金。水穀之道。胃爲土。水穀之海也。金土子母。而足陽明爲胃之經。其脈有從缺盆下於乳者。因勞傷其脈。虛而受風寒。

風寒搏血氣。血否澀不通。故結癰腫。腫結皮薄以澤者爲癰。而風氣乘虛入胃。則水穀糟粕變敗不結聚。陽虛則泄爲利。金土子母俱虛。故發乳而復利也。又發乳渴引飲多亦變利也。

發乳久不瘥候

此謂發乳癰而有冷氣乘之。故癰疽結經久不消不潰。而爲冷所客。則膿汁出不盡。而久不瘥。

發乳餘核不消候

此謂發乳之後。餘熱未盡。而有冷氣乘之。故餘核不消。復遇熱蘊積爲膿。亦有淋瀝不瘥。而變爲痿也。

發乳瘦候

此謂因發癰瘡而膿汁未盡。其瘡暴瘥。則惡汁內食。後更發。則成痿者也。

巢氏諸病源候總論 卷四十 婦人雜病諸候四

巢氏諸病源候總論

隋 太醫博士巢元方撰

鄞縣曹赤電炳章圈點

卷四十一

婦人妊娠病諸候上 凡二十論

妊娠候

經云。陰搏陽別。謂之有子。此是氣血和調。陽施陰化也。診其手少陰脈動甚者。妊子也。少陰心脈也。心主血脈。又腎名胞門子戶。尺中腎脈也。尺中之脈。按之不絕者。妊娠脈也。三部沉浮正等。按之無斷絕者有娠也。又左手沉實爲男。右手浮大爲女。左右俱沈實生二男。左右俱浮大生二女。又尺脈左偏大爲男。右偏大爲女。左右俱大產二子。又左右手尺脈俱浮爲產二男。不爾女作男生。俱沉爲產二女。

不爾男作女生。又左手尺中脈浮大者男。右手尺脈沉細者女。又得太陰脈爲男。得太陰脈爲女。太陰脈沈。太陽脈浮。欲知男女。遣面南行。還復呼之。左迴首是男。右迴首是女。又看上圍時。夫從後急呼之。左迴首是男。右迴首是女。婦人妊娠。其夫左邊乳房有核是男。右邊乳房有核是女。妊娠一月。名曰始形。飲食精熟。酸美受御。宜食大麥。無食腥辛之物。是謂才貞。足厥陰養之。足厥陰者。肝之脈也。肝主血。一月之時。血流澁。始不出。故足厥陰養之。足厥陰穴在足大指歧間。白肉際是。妊娠二月。名曰始膏。無食腥辛之物。居必靜處。男子勿勞。百節皆痛。是謂始藏也。足少陽養之。足少陽者。膽之脈也。主於精。二月之時。兒精成於胞裏。故足少陽養之。足少陽穴在足小指間本節後附骨上一寸陷中者是。妊娠三月。始胎。當此之時。血不流。形像始化。未有定儀。見物而變。欲令見貴盛。公王好人端正莊嚴。不欲令見偃僂侏儒醜惡形人及猿猴之類。無食薑兔。無懷刀繩。欲得男者。操弓矢。射雄雉。乘肥馬於田野。觀虎豹及走犬。其欲得女者。則著簪珂環珮。弄珠璣。欲令子美好端正者。數視白璧美玉。看孔雀。食鯉魚。欲令兒多智有力。則噉牛心。食大麥。欲令子賢良盛德。則端心正坐。清虛和氣。坐無邪席。立無偏倚。行無邪徑。

目無邪視。耳無邪聽。口無邪言。心無邪念。無妄喜怒。無得思慮。食無到嚮。無邪臥。無橫足。思欲果瓜。噉味酸菹。好芬芳。惡見穢臭。是謂外象而變者也。手心主養之。手心主者。脈中精神。內屬於心。能清神。故手心主養之。手心主穴在掌後橫文。是診其妊娠脈滑疾。重以手按之散者。胎已三月也。妊娠四月之時。始受水精。以成血脈。其食宜稻稗。其羹宜魚雁。是謂盛榮以通耳目。而行經絡。洗浴遠避寒暑。是手少陽養之。手少陽者。三焦之脈也。內屬於府。四月之時。兒六府順成。故手少陽養之。手少陽穴在手小指間本節後二寸是也。診其妊娠四月。欲知男女。左脈疾爲男。右脈疾爲女。左右俱疾。爲生二子。當此之時。慎勿瀉之。必致產後之殃。何謂也。是手少陽三焦之脈。內屬於三焦。靜形體。和心志。節飲食。妊娠五月。始受火精。以成其氣。臥必晏起。洗浣衣服。深其屋室。厚其衣裳。朝吸天光。以避寒殃。其食宜稻麥。其羹宜牛羊。和以茱萸。調以五味。是謂養氣。以定五臟者也。一本云。宜食魚鱉。足太陰養之。足太陰脾之脈。主四季。五月之時。兒四支皆成。故足太陰養之。足太陰穴在足內踝上三寸也。診其妊娠脈重手按之不散。但疾不滑者。五月也。又其脈數者。必向壞。脈緊者。必胞阻。脈遲者。必腹滿喘。脈浮者。必水壞爲腫。

妊娠六月。始受金精。以成其筋。身欲微勞。無得靜處。出游於野。數觀走犬及視走馬。宜食鷙鳥猛獸之肉。是謂變腠。脊筋以養其爪。以牢其背。膂足陽明養之。足陽明者。胃之脈。主其口目。六月之時。兒口目皆成。故足陽明養之。足陽明穴在太衝上二寸是也。妊娠七月。始受木精。以成骨。勞躬搖支。無使定止。動作屈伸。居處必燥。飲食避寒。常宜食稻稊。以密腠理。是謂養骨。牢齒者也。手太陰養之。手太陰者。肺脈主皮毛。七月之時。兒皮毛已成。故手太陰養之。手太陰穴在手大指本節後。白肉際陷中是。診其妊娠七月。脈實大牢強者生。沈細者死。懷軀七月而不可知。時時衄而轉筋者。此爲軀衄。時嚏而動者。非軀也。懷軀七月。暴下斗餘水。其胎必倚而墮。此非時孤漿預下故也。妊娠八月。始受土精。以成膚革。和心靜息。無使氣極。是謂密腠理。而光澤顏色。手陽明養之。手陽明者。大腸脈。大腸主九竅。八月之時。兒九竅皆成。故手陽明養之。手陽明穴在大指本節後。宛宛中是。診其妊娠八月。脈實大牢強弦緊者生。沉細者死。任脈九月。始受石精。以成皮毛。六府百節。莫不畢備。飲醴食甘。緩帶自持而待之。是謂養毛髮。多才力。足少陰養之。足少陰者。腎之脈。腎主續縷。九月之時。兒脈續縷皆成。故足少陰養之。足少陰穴在

足內踝後微近下前動脈是也。 妊娠十月。五臟俱備。六腑齊通。納天地氣於丹田。故使關節人神咸備。然可預修滑胎方法也。

妊娠惡阻候

惡阻病者。心中憤悶。頭眩。四肢煩疼。懈惰不欲執作。惡聞食氣。欲噉酸果實。多睡少起。世云惡食。又云惡字是也。乃至三四月日以上大劇者。不能自勝舉也。此由婦人元本虛羸。血氣不足。腎氣又弱。兼當風飲冷太過。心下有痰水挾之。而有娠也。經血既閉。水漬於藏。藏氣不宣通。故心煩憤悶。氣逆而嘔吐也。血脈不通。經絡否澁。則四支沈重。挾風則頭目眩。故欲有胎而病惡阻。所謂欲有胎者。其人月水尙來。而顏色皮膚如常。但苦沈重憤悶。不欲食飲。又不知其患所在。脈理順時平和。卽是欲有胎也。如此經二月日後。便覺不通。則結胎也。

妊娠轉女爲男候

陰陽和調。二氣相感。陽施陰化。是以有娠。而三陰所會則多生女。但妊娠二月名

曰始藏。精氣成於胞裏。至於三月。名曰始胎。血脈不流。象形而變。未有定儀。見物而化。是時男女未分。故未滿三月者。可服藥方術轉之。令生男也。

妊娠養胎候

妊娠之人。有宿挾痲疹。因而有娠。或有娠之時節。適乖理。致生疾病。並令腑臟衰損。氣力虛羸。令胎不長。故須服藥去其疾病。益其氣血。以扶養胎也。

妊娠禁忌候

妊娠男女未分之時。未有定儀。見物而化。故須端正莊嚴。清靜和平。無傾視。無邪聽。兒在胎。日月未滿。陰陽未備。腑臟骨節皆未成足。故自初訖于將產。飲食居處。皆有禁忌。

妊娠胎間水氣子滿體腫候

胎間水氣子滿體腫者。此由脾胃虛弱。腑臟之間有停水。而挾以妊娠故也。妊娠

之人。經血壅閉。以養於胎。若挾有水氣。則水氣相搏。水漬於胎。兼傷腑臟。脾胃主身之肌肉。故氣虛弱。肌肉則虛。水氣流溢於肌。故令體腫。水漬於胞。則令胎壞。然妊娠臨將產之月。而脚微腫者。其產易。所以爾者。胞藏水血俱多。故令易產。而水乘於外。故微腫。但須將產之月耳。若初妊而腫者。是水氣過多。兒未成具。故壞胎也。壞胎脈浮者。必腹滿而喘。壞娠爲水腫。

妊娠漏胞候

漏胞者。謂妊娠數月而經水時下。此由衝脈任脈虛不能約制。太陽少陰之經血故也。衝任之脈爲經脈之海。皆起於胞內。手太陽小腸脈也。手少陰心脈也。是二經爲表裏。上爲乳汁。下爲月水。有娠之人。經水所以斷者。壅之以養胎。而蓄之爲乳汁。衝任氣虛。則胞內泄漏不能制其經血。故月水時下。亦名胞阻。漏血盡則人斃也。

妊娠胎動候

胎動不安者。多因勞役氣力。或觸冒冷熱。或飲食不適。或居處失宜。輕者止轉動不安。重者便致傷墮。若其母有疾以動胎。治母則胎安。若其胎有不牢固。致動以病母者。治胎則母瘥。若傷動甚者。候其母面赤舌青者。兒死母活。母唇口青。口兩邊沫出者。母子俱死。母面青舌赤。口中沫出。母死子活。

妊娠僵仆胎上搶心下血候

此謂行動倒仆。或從高墮下。傷損胞絡。致血下動胎。而血傷氣逆者。胎隨氣上搶心。其死生之候。其母舌青者。兒死母活。唇口無沫。兒生。唇青沫出者。母子俱死。唇口青舌赤者。母死兒活。若下血不住。胞燥胎枯。則令胎死。

妊娠胎死腹中候

此或因驚動倒仆。或染溫疫傷寒。邪毒入於胞臟。致令胎死。其候當胎處冷。爲胎已死也。

妊娠腹痛候

腹痛皆由風邪入於腑臟。與血氣相擊搏。所爲任娠之人。或宿挾冷疹。或新觸風邪。疔結而痛。其腹痛不已。邪正相干。血氣相亂。致傷損胞絡。則令動胎也。

妊娠心痛候

夫心痛多是風邪痰飲乘心之經絡。邪氣搏於正氣交結而痛也。若傷心正經而痛者。爲真心痛。心爲神統領諸藏。不可受邪。邪若傷之。朝發夕死。夕發朝死。若傷心支別絡而痛者。則乍間乍盛。休作有時。妊娠之人。感其病者。痛不已。氣乘胞絡。傷損子臟。則令動胎。凡胎動則胎轉移不安。不安而動於血者。則血下也。

妊娠心腹痛候

妊娠心腹痛者。或由腹內宿有冷疹。或新觸風寒。皆因藏虛而致發動。邪正相擊而并於氣。隨氣下上。上衝於心則心痛。下攻於腹則腹痛。故令心腹痛也。妊娠而病之者。正邪二氣交擊於內。若不時瘥者。其痛衝擊胞絡。必致動胎。甚則傷墮。

妊娠腰痛候

腎主腰脚。因勞損傷動其經。虛則風冷乘之。故腰痛。婦人腎以繫胞。妊娠而腰痛甚者。多墮胎也。

妊娠腰腹痛候

腎主腰脚。其經虛風冷客之。則腰痛。冷氣乘虛入腹。則腹痛。故令腰腹相引而痛不止。多動胎。腰痛甚者。則胎墮也。

妊娠小腹痛候

妊娠小腹痛者。由胞絡宿有冷。而妊娠血不通。冷血相搏故痛也。痛甚亦令動胎也。

妊娠卒下血候

此謂卒有損動。或冷熱不調和。致傷於胎。故卒痛下血不止者。墮胎也。

妊娠吐血候

吐血皆由腑臟傷所爲。憂思驚怒皆傷臟腑。氣逆故吐血。吐血而心悶胸滿未欲止。心悶甚者死。妊娠病之多墮胎也。

妊娠尿血候

尿血由勞傷經絡而有熱。熱乘於血。血得熱流溢滲入於胞。故尿血也。

妊娠數墮胎候

陽施陰化。故得有胎。榮衛和調。則經養周足。故胎得安而能成長。若血氣虛損者。子臟爲風冷所居。則血氣不足。故不能養胎。所以致胎數墮。候其妊娠而恆腰痛者。喜墮胎也。

巢氏諸病源候總論 卷四十一 婦人妊娠病諸候上

巢氏諸病源候總論

隋 太醫博士巢元方撰

鄞縣曹赤電炳章圈點

卷四十二

婦人妊娠病諸候下 凡四十一論

妊娠傷寒候

冬時嚴寒。人體虛而爲寒所傷。卽成病爲傷寒也。輕者嗇嗇惡寒。噲噲發熱。微欬鼻壅。數日乃止。重者頭痛體疼。增寒壯熱。久不歇。亦傷胎也。

妊娠傷寒後復候

冬時嚴寒。人體虛。觸冒之得病。名傷寒。其狀頭痛體疼。壯熱。瘥後。體虛尙未平復。

或起早。或飲食過度。病更如初。故謂之復也。

妊娠時氣候

四時之間。忽有非節之氣。如春時應暖而反寒。夏時應熱而反冷。秋時應涼而反熱。冬時應寒而反溫。非其節而有其氣。一氣之至。無人不傷。長少雖殊。病皆相似者。多挾於毒。言此時普行此氣。故云時氣也。妊娠過之。重者傷胎也。

妊娠溫病候

冬時嚴寒。人有觸冒之。寒氣伏藏肌骨。未即病。至春而發。謂之溫也。亦壯熱。大體與傷寒相似。又冬時應寒而反溫。溫氣傷人。即病。亦令壯熱。謂之溫病。妊娠遇此病。熱搏於胎。皆損胎也。

妊娠熱病候

冬時嚴寒。觸冒傷之。藏於肌骨。夏至乃發。壯熱。又爲暑病。暑病即熱病也。此寒氣

蘊積。發卽有毒。妊娠遇之。多致墮胎也。

妊娠寒熱候

妊娠寒熱病者。猶是時氣之病也。此病起於血氣虛損。風邪乘之。致陰陽并隔。陽勝則熱。陰勝則寒。陰陽相乘。二氣交爭。故寒熱。其妊娠而感此病者。熱甚則傷胎也。

妊娠寒瘧候

夫瘧者由夏傷於暑。客於皮膚。至秋因勞動血氣。腠理虛而風邪乘之。動前暑熱。正邪相擊。陰陽交爭。陽盛則熱。陰勝則寒。陰陽更虛更盛。故發寒熱。陰陽相離。寒熱俱歇。若邪動氣至交爭。則復發。故瘧休作有時。其發時節漸晏者。此由風邪客於風府。循膂而下。衛氣一日一夜常大會於風府。其明日日下一節。故其作發日晏。其發日早者。衛氣之行風府。日下一節。二十一日下至尾骶。二十二日入脊內。上注於伏衝之脈。其行九日。出於缺盆之內。其氣既上。故其病發更早。其間日發。

者。由風邪內薄五藏。橫連募原。其道遠。其氣深。其行遲。不能日作。故間日蓄積乃發。妊娠而發者。寒熱之氣迫傷於胎。多致損動也。

妊娠下利候

春傷於風。邪氣留連。遇腸胃虛弱。風邪因而傷之。腸虛則洩。故爲下利。然此水穀利也。

妊娠滯利候

冷熱不調。腸虛者。冷熱之氣客於其間。熱氣乘之則赤。冷氣乘之則白。冷熱相交連滯。故赤白如魚腦鼻涕相雜。爲滯利也。

妊娠胸脇支滿候

妊娠經血不通。上爲乳汁。兼以養胎。若宿有停飲者。則血飲相搏。又因冷熱不調。動於血飲。血飲乘氣逆上。搶於胸脇。脹滿。脹滿而氣小喘。謂之支滿。

妊娠痰候

水飲停積。結聚爲痰。人皆有之。少者不能爲害。若多則成病。妨害飲食。乃至嘔吐。妊娠病之。若嘔吐甚者。傷胎也。

妊娠子煩候

臟虛而熱。氣乘於心。則令心煩。停痰積飲在於心胸。其冷衝心者。亦令煩也。若虛熱而煩者。但煩熱而已。若有痰熱而煩者。則嘔吐涎沫。妊娠之人。既血飲停積。或虛熱相搏。故亦煩。以其妊娠而煩。故謂之子煩也。

妊娠霍亂候

陰陽清濁相干。謂之氣亂。氣亂於腸胃之間。爲霍亂也。但飲食過度。冒觸風冷。使陰陽不和。致清濁相干。腸胃虛者受之。故霍亂也。先心痛則先吐。先腹痛則先利。心腹俱痛。吐利並發。有頭痛體疼。發熱而吐利者。亦爲霍亂。所以然者。挾風而有

實故也。風折血氣。皮膚閉密。血氣不得宣。故令壯熱。風邪乘其經脈。氣上衝於頭。則頭痛。風氣入於腸胃。腸虛則洩利。胃逆則嘔吐。故吐利也。吐利甚則煩。府藏虛故也。又手足逆陰。陽氣暴竭。謂之四逆也。妊娠而病之。吐利甚者。則傷損胎也。

妊娠中惡候

人有忽然心腹刺痛悶亂欲死。謂之中惡。言惡邪之氣中傷於人也。所以然者。人之血氣自養。而精神爲主。若血氣不和。則精神衰弱。故厲毒鬼氣得中之。妊娠病之。亦致損胎也。

妊娠腹滿候

妊娠腹滿者。由腹內宿有寒冷停飲。挾以妊娠。重因觸冷。則冷飲發動。邪氣相干。故令腹滿也。

妊娠欬嗽候

肺感於微寒。寒傷於肺。則成欬嗽。所以然者。肺主氣候皮毛。寒之傷人。先客皮毛。故肺受之。又五藏六府俱受氣於肺。以四時更王。五藏六府亦皆有欬嗽。各以其時。感於寒而爲欬嗽也。秋則肺受之。冬則腎受之。春則肝受之。夏則心受之。其諸藏欬嗽不已。各傳於府。妊娠而病之者。久不已。傷於胎也。

妊娠胸痺候

胸痺者。由寒氣客於藏府。上衝胸心。幅幅如滿。噎塞。習習而痺痛。胸中慄慄然。飲食不下。謂之胸痺也。而脾胃漸弱。乃至斃人。妊娠而病之。非直妊婦爲患。亦傷損於胎也。

妊娠咽喉身體著毒腫候

毒腫者。是風邪厲毒之氣。客入肌肉。搏於血氣。積聚所成。然邪毒傷人。無有定處。隨經絡虛處而留止之。故或著身體。或著咽喉。但毒之所停。血則否澀。血氣與邪相搏。故成腫也。其毒發於身體。猶爲小緩。若著咽喉。最急便腫塞痺痛。乃至水漿

不通。毒入攻心。心煩悶。妊娠者。尤宜急救。不爾子母俱傷也。

妊娠中蠱毒候

蠱毒者。人有以蛇蠃。蜚蠊。諸蟲合著一處。令其自相殘食。餘一個在者。名之爲蠱。諸山縣人多作而敬事之。因飲食裹以毒斃人。又或吐血利血。是食人腑臟則死。又云有緩急。緩者延引日月。急者止在旦夕。以法術知其主呼之。蠱去乃瘥。平人遇之尙死。況妊娠者。故子母俱傷也。

妊娠飛尸入腹候

飛尸者。是五尸中一尸也。其遊走皮膚。貫穿臟腑。每發刺痛。變作無常。爲飛尸也。妊娠病之者。亦損胎也。

妊娠患子淋候

淋者。腎虛膀胱熱也。腎虛不能制水。則小便數也。膀胱熱則水行澀。澀而且數。淋

瀝不宣。妊娠之人。胞繫於腎。腎患虛熱成淋。故謂子淋也。

妊娠大小便不通候

人有府藏氣實而生於熱者。隨停積之處成病。若熱結大腸。大便不通。熱結小腸。小便不通。若大小腸俱爲熱所結。故煩滿。大小便不通也。凡大小便不通。則內熱。腸胃氣逆。令變乾嘔也。

妊娠大便祕不通候

三焦五藏不調和。冷熱否結。津液竭燥。腸胃否澀。蘊積結於腸間。則大便不通。令腹否滿煩熱。甚者變乾嘔。所以然者。胃內熱氣逆也。

妊娠大小便不利候

冷熱之氣不調。乘於大小腸。則謂之爲遊氣壅否而生熱。或熱病熱入大小腸。並令大小便不利也。凡大小便不利。則心脇滿。食不下而煩躁不安也。

妊娠小便利候

小便利者。腎虛胞冷。不能溫制於小便。故小便利也。

妊娠小便數候

腎與膀胱合俱主水。腎氣通於陰。腎虛而生。熱則小便澀。虛則小便數。虛熱相搏。雖數起而不宣快也。

妊娠小便不利候

腎與膀胱合俱主水。水行入胞。爲小便臟腑有熱。熱入於胞。故令小便不利也。

妊娠小便不通候

小腸有熱。熱入於胞內。熱結甚者。故小便不通。則心脇小腸俱滿氣喘急也。

妊娠驚胎候

驚胎者。見懷妊月將滿。或將產。其胎神識已具。外有勞傷損動。而胎在內驚動也。

妊娠中風候

四時八方之氣爲風。常以冬至之日候之。風從其鄉來者。長養萬物。若不從鄉來者。爲虛風賊於人。人體虛者則中之。五藏六府俞皆在背。藏府虛。風邪皆從其俞入。人中之。隨府藏所感而發也。心中風。但偃臥不得傾側。汗出唇赤。汗流者可治。急灸心俞百壯。若唇或青或白。或黃或黑。此是心壞爲水。面目亭亭。時悚動者。皆不可治。五六日而死。若肝中風。但踞坐不得低頭。若繞兩目連額。色微有青。唇青面黃可治。急灸肝俞百壯。若大青黑面一黃一白者。是肝已傷。不可治。數日而死。若脾中風。踞而腹滿。身通黃。吐鹹汁出者可治。急灸脾俞百壯。若手足青者不可治。若腎中風。踞而腰痛。視脇左右未有黃。如餅烙大者可治。急灸腎俞百壯。若齒黃赤鬢髮直。面土色者不可治也。若肺中風。偃臥而胸滿短氣。冒悶汗出。視目下鼻上下兩邊下行至口。色白可治。急灸肺俞百壯。若色黃爲肺已傷。化爲血。不可治。其人當妄掇空。或自拈衣。如此數日而死。妊娠而中風。非止妊婦爲病。甚者損

胎也。

妊娠瘕候

體虛受風而傷太陽之經。停滯經絡。後復遇寒濕相搏。發則口噤背強。名之爲瘕。妊娠而發者。悶冒不識人。須臾醒。醒復發。亦是風傷太陽之經作瘕也。亦名子癩。亦名子冒也。

妊娠鬼胎候

夫人腑臟調和。則血氣充實。風邪鬼魅不能干之。若榮衛虛損。則精神衰弱。妖魅鬼精得入於藏。狀如懷娠。故曰鬼胎也。

妊娠兩胎一生一死候

陽施陰化。精盛有餘者。則成兩胎。胎之在胞。以血氣資養。若寒溫節適。虛實調和。氣血強盛。則胎無傷夭。若冷熱失宜。氣血損弱。則胎翳燥不育。其兩胎而一死者。

是血過於寒。其經養不周。故偏夭死也。候其胎上冷。是胎已死也。

妊娠胎痿燥候

胎之在胞。血氣資養。若血氣虛損。胞藏冷者。胎則翳燥。委伏不長。其狀兒在胎都不轉動。日月雖滿。亦不能生。是其候也。而胎在內痿燥。其胎多死。

妊娠過年久不產候

過年不產。由挾寒冷宿血在胞而有胎。則冷血相搏。令胎不長。產不以時。若其胎在胞。日月雖多。其胎翳小。轉動勞羸。是挾於病。必過時乃產。

妊娠墮胎後血出不止候

墮胎損經脈。損經脈故血不止也。瀉血多者。便致煩悶。乃至死也。

妊娠墮胎後血不出候

此由宿有風冷。因墮胎血冷相搏。氣虛逆上者。則血結不出也。其血逆上。捨心。則亦煩悶。甚者致死。

妊娠墮胎胎衣不出候

此由墮胎初下。婦人力羸。不能更用氣。產胞便遇冷。冷則血澀。故胞衣不出也。若胞上掩心煩悶。乃至於死也。

妊娠墮胎後腹痛虛乏候

此由墮胎之時。血下過少。後餘血不盡。將攝未復。而勞傷氣力。觸冒風冷。風冷搏於血氣。故令腹痛。勞傷血氣。不復則虛乏。而餘血不盡。結搏於內。多變成血瘕。亦令月水不通也。

妊娠墮胎後著風候

墮胎後榮衛損傷。腠理虛疎。未得平復。若起早當風取涼。即著於風。初止羸弱。或

飲食減少。氣力不即平復。若風挾冷入腹內。搏於血結成刺痛。若入腸胃。亦下利。入經絡。或痺或疼痛。若入太陽之經。則腰背強直成瘕。或角弓反張。或口喎僻。或緩弱不隨。或一邊攣急。各隨所傷處而成病也。

妊娠欲去胎候

此謂妊娠之人羸瘦。或挾疾病。既不能養胎。兼害妊婦。故去之。

巢氏諸病源候總論 卷四十二 婦人妊娠病諸候下

巢氏諸病源候總論

隋 太醫博士巢元方撰

鄞縣曹赤電炳章圈點

卷四十二

婦人將產病諸候 凡三論

產法

人處三才之間。稟五行之氣。陽施陰化。故令有子。然五行雖復相生。而剛柔刑殺。互相害剋。至於將產。則有日遊反支禁忌。若犯觸之。或橫致諸病。至產時坐臥。產處須順四時五行之氣。故謂之產法也。

產防運法

防運者。諸臨產若觸犯日遊反支。諸所禁忌。則令血氣不調理。而致運也。其運之狀。心煩悶氣欲絕是也。故須預以法術防之。

胞衣不出候

有產兒下苦胞衣不落者。世謂之息胞。由產婦初時用力。比產兒出而體已疲頓。不能更用氣產胞。經停之間。外冷乘之。則血道否澀。故胞久不出。彌須急以方藥救治。不爾。害於兒。所以爾者。胞系連兒臍。胞不出則不得以時斷臍。浴洗冷氣傷兒。則成病也。舊方胞衣久不出。恐損兒者。依法截臍。而以物繫其帶一頭。亦有產而看產人不用意慎護。而挽牽甚。胞系斷者。其胞上掩心。則斃人也。縱令不死。久則成病也。

婦人難產病諸候 凡七論

產難候

產難者。或先因漏胎。去血臟燥。或子臟宿挾疹病。或觸禁忌。或始覺腹痛。產時未

到。便卽驚動。穢露早下。致子道乾澀。產婦力疲。皆令難也。候其產婦舌青者。兒死。母活。脣青口青。口兩邊沫出者。子母俱死。面青舌赤沫出者。母死子活。故將產坐臥產處。須順四時方面。并避五行禁忌。若有犯觸。多令產難。產婦腹痛而腰不痛者。未產也。若腹痛連腰甚者。卽產。所以然者。腎候於腰。胞繫於腎故也。診其尺脈轉急。如切繩轉珠者。卽產也。

橫產候

橫產由初覺腹痛。產時未至。驚動傷早。兒轉未竟。便用力產之。故令橫也。或觸犯禁忌所爲。將產坐臥產處。須順四時方面。并避五行禁忌。若觸犯。多致災禍也。

逆產候

逆產者。初覺腹痛。產時未至。驚動傷早。兒轉未竟。便用力產之。則令逆也。或觸犯禁忌。故產處及坐臥須順四時方面。并避五行禁忌。若觸犯。多致災禍也。養生方云。妊娠大小便勿至非常之去處。必逆產殺人。

產子上逼心候

妊娠將養得所。則氣血調和。故兒在胎則安。當產亦易。若節適失宜。則血氣乖戾。兒在胎則亟動。至產育亦難。產而子上迫於心者。由產難用力。胎動氣逆。胎上衛迫於心也。凡胎上迫於心。則暴悶絕。胎下乃甦。甚者至死。凡產處及坐臥須順四時方面。并避五行禁忌。若有觸犯。多致災禍也。

產子但趨後孔候

產子但趨後孔者。由坐臥未安。忽遽強嘔。氣暴衝擊。故兒失其道。婦人產有坐有臥。若坐產者須正坐。傍人扶抱肋腰持捉之。勿使傾斜。故兒得順其理。臥產者亦待臥定。背平著席。體不偃曲。則兒不失其道。若坐臥未安。身體斜曲。兒身轉動。忽遽強嘔。氣暴衝擊。則令兒趨後孔。或橫或逆。皆由產時忽遽。或觸犯禁忌。坐臥不安。審所為故。產坐臥須平正。順四時方面。避五行禁忌。若有觸犯。多致災禍也。

產已死而子不出候

產婦已死而子不出。或觸犯禁忌。或產時未到。驚動傷早。或傍看產人抱腰捉。失理。皆令產難。而致胎上掩心悶絕。故死也。候其婦將困乏際。面青舌赤口沫出者。則母死兒活也。故產處坐臥須順四時方面。避五行禁忌。若有觸犯。多招災禍也。

產難子死腹中候

產難子死腹中者。多因驚動過早。或觸犯禁忌。致令產難。產難則穢沃下。產時未到。穢露已盡。而胎枯燥。故子死腹中。候其產婦舌青黑及胎上冷者。子已死也。故行處坐臥。須順四時方面。避五行禁忌。若有觸犯。多招災禍也。

婦人產後病諸候上 凡三十論

產後血運悶候

運悶之狀。心煩氣欲絕是也。亦有去血過多。亦有下血極少。皆令運。若產去血過多。血虛氣極。如此而運悶者。但煩悶而已。若下血過少。而氣逆者。則血隨氣上。掩

於心。亦令運悶。則煩悶而心滿急。二者爲異。亦當候其產婦血下多少。則知其產後應運與不運也。然煩悶不止則斃人。凡產時當向坐臥。若觸犯禁忌多令運悶。故血下或多或少。是以產處及坐臥。須順四時方面。避五行禁忌。若有觸犯。多招災禍也。

產後血露不盡候

凡妊娠當風取涼。則胞絡有冷。至於產時。其血下必少。或新產而取風涼。皆令風冷搏於血。致使血不宣消。蓄積在內。則有時血露淋瀝下不盡。

產後惡露不盡腹痛候

妊娠取風冷過度。胞絡有冷。比產血下則少。或新產血露未盡。而取風涼。皆令風冷搏於血。血則壅滯不宣消。蓄積在內。內有冷氣。共相搏擊。故令痛也。甚者則變成血瘕。亦令月水不通也。

產後血上搶心痛候

產後氣虛挾宿寒。寒搏于血。血則凝結不消。氣逆上者。則血隨上搶。衝擊而心痛也。凡產餘血不盡。得冷則結。與氣相搏則痛。因重遇於寒。血結彌甚。變成血瘕。亦令月水否澀不通。

半產候

半產謂妊娠兒骨節腑臟漸具。而日月未足便產也。多因勞役驚動所致。或觸犯禁忌亦然也。

產後血瘕痛候

新產後有血氣相擊而痛者。謂之瘕痛。瘕之言假也。謂其痛浮假無定處也。此由宿有風冷。血氣不治。至產血下少。故致此病也。不急治。多成積結。妨害月水。輕則否澀。重則不通。

產後風虛腫候

夫產傷血勞氣。腠理則虛。爲風邪所乘。邪搏於氣。不得宣泄。故令虛腫。輕浮如吹者。是邪搏於氣。氣腫也。若皮薄如熟李狀。則變爲水腫也。氣腫發汗卽愈。水腫利小便卽瘥。

產後腹中痛候

產後臟虛。或宿挾風寒。或新觸冷。與氣相擊搏。故腹痛。若氣逆上者。亦令心痛。胸脇痛也。久則變成疝瘕。

產後心腹痛候

產後氣血俱虛。遇風寒乘之。與血氣相擊。隨氣而上衝於心。或下攻於腹。故令心腹痛。若久痛不止。則變成疝瘕。

產後心痛候

產後臟虛。遇風冷客之。與血氣相搏。而氣逆者。上攻於心之絡。則心痛。凡心痛乍

間乍甚。心之支別絡爲邪所傷也。若邪傷心之正經。爲真心痛。朝發夕死。夕發朝死。所以然者。心爲諸臟之主。不受邪。邪傷卽死也。

產後小腹疼痛候

此由產時惡露下少。胞絡之間有餘血者。與氣相擊搏。令小腹痛也。因重遇冷則血結。變成血瘕。亦令月水不利也。

產後腰痛候

腎主腰脚。而婦人以腎繫胞。產則勞傷腎氣。損動胞絡。虛未平復。而風冷客之。冷氣乘腰者。則令腰痛也。若寒冷邪氣連滯腰脊。則痛久不已。後有娠。喜墮胎。所以然者。胞繫腎。腎主腰脊也。

產後兩脅腹滿痛候

膀胱宿有停水。因產惡露下少。血不宣消。水血壅否。與氣相搏。積在膀胱。故令脅

腹俱滿。而氣動與水血相擊則痛也。故令兩脅腹滿痛。亦令月水不利。亦令成血瘕也。

產後虛煩短氣候

此由產時勞傷重者。血氣虛極。則其後未得平和。而氣逆乘心。故心煩也。氣虛不足。故短氣也。

產後上氣候

肺主氣。五臟六腑俱稟氣於肺。產則氣血俱傷。臟腑皆損。其後肺氣未復。虛竭逆上。故上氣也。

產後心虛候

肺主氣。心主血脈。而血氣通榮臟腑。徧循經絡。產則血氣傷損。臟腑不足。而心統領諸臟。其勞傷不足。則令驚悸恍惚。是心氣虛也。

產後虛煩候

產血氣俱傷。臟腑虛竭。氣在內不宣。故令煩也。

產後虛熱候

產後腑臟勞傷。血虛不復。而風邪乘之。搏於血氣。使氣不宣泄。而否澀生熱。或支節煩憤。或脣乾燥。但因虛生熱。故謂之虛熱也。

產後虛羸候

夫產損動腑臟。勞傷氣血。輕者節養將攝。滿月便得平復。重者其日月雖滿。氣血猶未調和。故虛羸也。然產後虛羸。將養失所。多沈滯勞瘠。乍起乍臥。風冷多則辟瘦。顏色枯黑。食飲不消。風熱多則腰腿虛乏。顏色無異於常。食亦無味。甚傷損者。皆著牀。此勞瘠也。

產後風冷虛勞候

產則血氣勞傷。腑臟虛弱。而風冷客之。風冷搏於血氣。血氣不能自溫於肌膚。使人虛乏疲頓致羸。損不平復。謂之風冷虛勞。若久不瘥。風冷乘虛而入腹。搏於血。則否澀。入腸則不利。不能養。或食不消。入於臟則胞臟冷。亦使無子也。

產後汗出不止候

夫汗由陰氣虛而陽氣加之。裏虛表實。陽氣獨發於外。故汗出也。血爲陰。產則傷血。是爲陰氣虛也。氣爲陽。其氣實者。陽加於陰。故令汗出。而陰氣虛弱不復者。則汗出不止也。凡產後皆血虛故多汗。因之遇風。則變爲瘧。縱不成瘧。則虛乏短氣。身體柴瘦。脣口乾燥。久變經水斷絕。津液竭故也。

產後汗血候

肝藏血。心主血脈。產則勞損肝心。傷動血氣。血爲陰。陰虛而陽氣乘之。卽令汗血。此爲陰氣大虛。血氣傷動。故因汗血出。乃至斃人。

產後虛渴候

夫產水血俱下。腑臟血燥。津液不足。宿挾虛熱者。燥竭則甚。故令渴。

產後餘疾候

產後餘疾。由產勞傷腑臟。血氣不足。日月未滿。而起早勞役。虛損不復。爲風邪所乘。令氣力疲乏。肌肉柴瘦。若氣冷入於腸胃。腸胃虛冷。時變下利。若入搏於血。則經水否澀。冷搏氣血。亦令腹痛。隨腑臟虛處。乘虛傷之。變成諸疾。以其因產傷損。餘勢不復。致羸瘠疲頓。乍瘥乍甚。故謂產後餘疾也。

產後中風候

產則傷動血氣。勞損腑臟。其後未平復。起早勞動。氣虛而風邪乘虛傷之。致發病者。故曰中風。若風邪冷氣。初客皮膚。經絡疼痺不仁。若乏少氣。其人筋脈挾寒。則攣急喎僻。挾濕則強脈緩弱。若入傷諸臟腑。恍惚驚悸。隨其所傷腑臟經絡而爲諸疾。凡中風。風先客皮膚。後因虛入傷五臟。多從諸臟俞入。若心中風。但得偃臥。不得傾側汗出。若脣赤汗流者可治。急灸心俞百壯。脣或青或白。或黃或黑。此是

心壞爲水。面目亭亭。時悚動。皆不可復治。五六日而死。若肝中風。踞坐不得。低頭若繞。兩目連額。上色微有青。脣青面黃可治。急灸肝俞百壯。若大青黑面。一黃一白者。是肝已傷。不可復治。數日而死。若脾中風。踞而腹滿。體通黃。吐鹹水。出可治。急灸脾俞百壯。若手足青者。不可復治也。腎中風。踞而腰痛。視脇左右。未有黃色。如餅。餠大者可治。急灸腎俞百壯。若齒黃赤鬢髮直。面土色。不可復治也。肺中風。偃臥而脅滿。短氣。冒悶。汗出。視目下鼻上下兩邊。下行至口。色白可治。急灸肺俞百壯。若色黃爲肺已傷。化爲血。而不可復治。其人當妄掇空。或自拈衣。如此數日而死。

產後中風口噤候

產後中風口噤者。是其氣虛而風入於頷頰夾口之筋也。手三陽之筋。結入於頷。產則勞損臟腑。傷動筋脈。風乘之者。其三陽之筋偏虛。則風偏搏之。筋得風冷則急。故令口噤也。

產後中風瘓候

產後中風瘳者。因產傷動血脈。臟腑虛竭。飲食未復。未滿日月。榮衛虛傷。風氣得入五臟。傷太陽之經。復感寒濕。寒搏於筋。則發瘳。其狀口急。噤。背強直。搖頭馬鳴。腰爲反折。須臾十發。氣急如絕。汗出如雨。手拭不及者。皆死。

產後中柔風候

柔風者。四肢不收。或緩或急。不得俛仰也。由陰陽俱虛。風邪乘之。風入於陽。則表緩。四肢不收也。入於陰。則裏急。不得俛仰也。產則血氣皆損。故陰陽俱虛。未得平復。而風邪乘之。故也。

產後中風不隨候

產後腑臟傷動。經絡虛損。日月未滿。未得平復。而起早勞動。風邪乘虛入。邪搏於陽。經者。氣行則遲。機關緩縱。故令不隨也。

產後風虛癩狂候

產後血氣俱虛。受風邪入井於陰。則癲忽發。臥地吐涎。口喎目急。手足繚。左右無所覺知。良久乃甦是也。邪入井於陽。則狂發。則言語倒錯。或自高賢。或罵詈不避尊卑是也。產則傷損血氣。陰陽俱虛。未平復者。爲風邪所乘。邪乘血氣。乍井於陽。乍井於陰。故癲狂也。

